

Pua keluar mesyuarat PAC, bantah Hasan lindungi PM dan 1MDB
Free Malaysia Today
Ogos 8, 2016
Minderjeet Kaur

Pua berkata, beliau malu menjadi sebahagian anggota PAC yang didakwanya cuba melindungi perdana menteri dan 1MDB.

KUALA LUMPUR: Ahli Parlimen Petaling Jaya Utara, Tony Pua hari ini meninggalkan mesyuarat Jawatankuasa Kira-kira Wang Negara (PAC) sebagai bantahan terhadap keengganan Datuk Hasan Arifin membuka semula siasatan 1MDB.

“Saya amat malu sebagai sebahagian PAC yang menjadi begitu lemah, cuba sembunyikan (kes 1MDB). Saya tidak boleh berada dalam mesyuarat itu dan berpura-pura melakukan kerja saya apabila skandal terbesar di Malaysia tidak dibincangkan.

“Biar kami panggil perdana menteri (untuk disoal siasat). Jika dia tidak bersalah, biar PAC lindungi nama baik perdana menteri,” kata Setiausaha Publisiti DAP itu di luar bangunan Parlimen.

Tegasnya, ada penting untuk membuka semula siasatan terhadap 1MDB, khususnya selepas saman sivil yang difailkan Jabatan Kehakiman Amerika Syarikat (DoJ) bagi menyita AS\$3.5 bilion yang didakwa digelapkan daripada syarikat milik Kementerian Kewangan Malaysia itu.

Pua berkata, beliau menyuarakan tiga permintaan dalam mesyuarat PAC.

Pertama, mendapatkan penjelasan berhubung laporan terbaru Wall Street Journal yang Good Star Limited adalah milik ahli perniagaan Malaysia, Low Taek Jho yang dikenali sebagai Jho Low.

“Saya tanya beliau jika laporan itu tulen. Saya tanya beliau (Hasan) mengenai surat Bank Negara yang ditujukan kepada semua ahli PAC menyatakan Good Star Limited adalah milik Jho Low,” katanya.

Pua berkata, kegagalan pengerusi PAC memberi jawapan berhubung laporan dan surat Bank Negara itu menunjukkan Hasan cuba “melindungi orang di sebalik 1MDB.”

Isu kedua yang dibangkitkan Pua ialah memohon kebenaran membuka semula laporan siasatan 1MDB, untuk mengenalpasti identiti ‘Malaysian Official 1’ (MO1) yang disebut dalam laporan DoJ.

Tony berkata laporan menyebut sejumlah US\$681 juta dimasukkan ke akaun peribadi MO1, lantas kes itu perlu disiasat.

“Sebab itu saya menggesa kes ini dibuka semula. Kita perlu memanggil Najib untuk mengetahui apa yang diperkatakan itu adalah benar atau palsu,” katanya sambil menambah PAC perlu melindungi Najib daripada DoJ, jika perdana menteri boleh membuktikan beliau tidak bersalah.

Permintaan ketiga Pua ialah menyiasat laporan mendakwa SRC International mengambil RM4 bilion daripada Kumpulan Wang Persaraan Diperbadankan (KWAP).

“Sepanjang mesyuarat, pengerusi asyik kata kami sudah lakukan bahagian kami. Kami sudah tutup kes ini.

“Macam mana itu boleh berlaku khasnya dengan pendedahan terbaru itu,” katanya yang kecewa tiga permintaan itu ditolak Hasan.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/08/08/pua-tinggalkan-mesyuarat-pac-bantah-hasan-lindungi-pm-dan-1mdb/>